

**Time - 7:30 -7:40 Hrs
AKASHVANI AIZAWL**

REGIONAL NEWS BULLETIN

HEADLINES (MORNING)

- Mizoram Legislative Assembly Speaker Pu Lalbiakzama chuan Zo hnahtlak hmun hrang hranga awmte chu Mizoah lungawi tlang turin a ngen.
- Chief Minister Pu Lalduhoma chuan Mizoram sawhthing hi a quality a tha a, damdawi anga hman theih a ni tih a sawi.
- Mizoram Police te chuan YouTube-a mipat-hmeichhiatna lam hawi thawnthu ngialngan tak tak chhiar thin mi pahnih an man.
- Telangana sawrkar chuan May 18 atanga 23 chhung hian special “Youth & Sports Week” a buatsaih dawn.

<><><>

SPEAKER

Mizoram Legislative Assembly Speaker Pu Lalbiakzama chuan Zo hnahtlak hmun hrang hranga awmte chu Mizoah lungawi tlang turin a ngen.

Pu Lalbiakzama hian nimin khan 'Hmar Pasaltha Ni' The 36th Hmar Martyrs Day puala The 19th State Level Hmar Football Trophy final match Saikawt Playground, Churanchandpur-a neih a hmanpui. a. Speaker chuan, Mizoah lungawi tlan a ngai. A har tih kan hria, theih loh erawh a ni lo. Mizo nihna ah hian kan inkhung leng vek tih hi pawm tlang phawt mai i la, a ti a. Zoram daifem leh Zoram pawnah pawh inti hrang lo in Mizo ah i in chhungkhawm vek turin a sawm a ni.

Speaker Pu Lalbiakzama chuan, Tawrhna avang chauha insuihkhawm lo in, remna boruak hnuaiah pawh in unauna vawng reng zel turin a chah a. Tawrhna ruam a in unauna ai chuan thlamuanna tlanga unau nih chu a par zu a thlum leh zual tih a sawi bawk.

He hun hi MLA Pu V. Malsawmtluanga, Vice Chairman leh High Power Committee ni bawk te, Hmar Inpui hruaitute, Hmartob hruaitu te, Martar chhungkua te, Pu Ricky Lalremsanga, CEM of Shinlung Hills Council, Council Member Pu Lalvenhima Hmar leh Pu Vanlalsiamsanga ten an hmanpui a ni.

<><><>

CM

Chief Minister Pu Lalduhoma chuan Mizoram sawhthing hi a quality a tha a, damdawi anga hman theih a ni tih a sawi.

Pu Lalduhoma hian nimin khan Samthang Community Hall-ah khawtlang mipuite buatsaih Sawhthing Kut a hmanpui a. Chief Minister chuan, Sawhthing chu Nikumah inzir chawpin hma an la tih sawiin, harsatna tam tak an tawk chungin an pek chhuah tur Support Price zawng zawng an pe chhuak thei tih a sawi a. Kuminah pawh a tir lamah a rate hi a tha mai lo va. An hun tiam thlen hmaa a rate hniama lo hralh ta mai khua an lo awm bawk a. Nimahsela, Pathian zarah an tum ang ngeiin an hun tiam atangin an lei tan leh a ni tih sawiin. Tunah phei chuan an beisei phak bakin sawhthing rate a rawn sang ta a. Hei hi an tih a ni lo va engkim chung a roreltu Pathian hnathawh a ni a ti bawk.

Adviser to Chief Minister Dr. KC Lalmsawmzauva pawhin thu sawiin, kumin bika support price an pek tawh chin chu cheng vaibelchhe 18 Crore vel a ni tawh a ti a. Kuminah SCC 24 velah Rs. 50 leh a chunglama an hralh avangin nikum ai chuan Support Price hi kan seng tlem zawkin a rinawm, a ti.

<><><>

YOUTUBER ARREST

Mizoram Police te chuan YouTube-a mipat-hmeichhiatna lam hawi thawnthu ngialngan tak tak chhiar thin mi pahnih an man.

Nimina Mizoram sorkar thu chhuah tarlan dan chuan, Cyber Crime Police Station chuan an thu dawn bawhzuiin Youtube account - NGAITHLASUHPUITLINGHUANG tih chu Henry Lalrinpuia (29), Hunthar, Aizawl siam leh khawih niin "puitlinghuangzz" tih chu Vanlalmangaihzuala (kum 35), Phuldungsei siam leh khawih a ni thung

Heng video-te hi mipui en theih tura chhawpchhuah an ni a, mipuite rilru hruai khawlovin, a bik takin naupangte rilru a tihbuai theih avangin heng an thiltihte hi Bharatiya Nyaya Sanhita, 2023 leh Information Technology Act, 2000 hnuai hrem theih a ni.

Mizoram Police chuan social media leh online platform dangah te hetiang mipat-hmeichhiatna lam hawi thlalak, video leh thawnthute thehdarh chu dan kalh a ni tih hre turin mipuite a chah nawn leh a. Social media hmanga dan bawhchhiate chungah na takin Mizoram Police chuan action a la zel dawn a ni.

<><><>

WEATHER

India Meteorological Department, Aizawl chuan thli leh ruah thawk thut thei reng a nih avangin mipui te chu fimkhur turin an chah.

Akashvani News Aizawl zawhna chhangin IMD Aizawl Director Pu Sudheer Kumar Dwivedi chuan, IMD thlirlawk dan chuan, India ramah Monsoon lo thlen hun tur chu May ni 26 a nih a rinawm a, a hun thlirlawkna hi ni 4 velin a danglam thei bawk. Kum dangah chuan Monsoon hi Kerela-ah chuan June ni 1-ah a lo thleng thin a, kuminah erawh chuan June ni 6-ah a lo thlen theih hmel chauh a ni.

Fur a thleng chho mek a, thli leh ruah thawk thut thut thei reng a nih tawh avangin mitin te mahni awmna hmunah theuh fimkhur a, lei min leh thuing tlu awm theihna hmunah te fimkhur zual turin IMD chuan an chah bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Wawiin chawhnu dar 2 leh a chanve-ah Chanchinthar puan leh a ni ang.

<><><>

ECM KNP DAY

ECM kohhran a Nu te pawl Krizypa No Py (KNP) dinchampha phak vawi 75-na leh Platinum Jubilee ni bawk chu wawiin hi a ni a, ECM KNP branch zawng zawng ten an din champha leh Platinum Jubilee hi an lawm mek a ni.

ECM KNP Hqrs ngenna angin kumin an Day hi Platinum kum a nih avangin kum dang zawng aia ropuia hmang tur leh ruai nena lawm theuh tura an ngen angin, KNP branch te chuan nimin atanga lawmin branch tam tak chuan ,an din champha hi Pathian Ni a nih avangin nimin khan lawmin inkhawmna hun an hmang a, ruai tlai lamah an theh hlawm.bawk.

Branch tinin Platinum Jubilee lung an phun bawk a, Kumin KNP Day thupui atan "Lalpan thil ropui tak min tihsak a, kan lawm hle a ni " Sam 126:3: tih chu hman a ni a, Branch thenkhatin Speaker hran nei a, hun hmangin Branch thenkhat erawh chuan KNP hruaitu thuchah sawi tur an inruat te hmangin Pathian thuchah ngaihthlak a ni bawk.

ECM kohhran-ah hian KNP branch 108 awmin member 11051 an awm mek a ni.

<><><>

HEROIN SEIZED

Excise & Narcotics Staff-te chuan nimin khan Champai leh Zote inkar Tuipui leiah heroin 327.87 gram (Hawng 28) leh a phurh nana hman Taxi an man.

Ruihhlo an man kaihhnawihah hian Thangmuanzova (kum 32) leh Tinngaihliana (kum 26), Ngur khua ve ve nia inchhal te chu an man nghal a ni.

Ruihlo avanga man hi ND&PS Act 1985 dan tlawh chhan a thubuui siamsak nghal an ni a, nimin vek khan court-ah thawn nghal an ni.

<><><>

Telangana Youth & Sports Week

Telangana sawrkar chuan May 18 atanga 23 chhung hian special "Youth & Sports Week" a buatsaih dawn a, hei hi ni 99 chhung aw h tur sorkar programme "Praja Palana Pragathi Pranalika" tih a ni. State pumah fitness, thalai hmasawna, leh hnathawhna tur kawng hrang hrang tihhmasawn nana tih a ni.

District leh local level-ah event buatsaih a ni ang a, thalai, zirlai, leh sports professional-te an tel ang. May 18 atang hian "Fit & Active Telangana" hmangin tan a ni ang a. Marathon intlansiak hi Hyderabad-ah L.B. Stadium leh district headquarters zawng zawngah te buatsaih a ni dawn a ni. State pumah walkathon, yoga, meditation, leh fitness session te buatsaih a ni bawk ang.

<><><>